

# AR POTR FIN

War don : *Ar seiz skiant naturel.*

Dre-holl ha da beb amzer, evid bean pôtr fin,  
E renker da nebeutan kâd eur begad ijin ;  
Teo 've ho muzello, true rei d'ac'h bara,  
Ma ve en ho penn ober eur pôtr fin gand netra.

C'houesk evel eur fistoulik, ramp 'vel eur zilien,  
Treitour evel eur c'haz gleb, flour 'vel eur glouaren,  
Ar pôtr fin dizeblant, don en ho kefridi,  
En esped d'ec'h evezianz, fouro dalc'h-mad e fri.

Gand armolud an ifern blerimed aliez,  
E laten da drouc'ha dous n'e deuz ket he farez ;  
Didrouz, e tispenna an dud gwellan brudet :  
Goud 'ra flemman 'vel eun aer en-mesk ar ieod kuzet.

M'en euz laked en e benn taillan eur finese,  
D'an diaoul, a-rok mankout, e werzo e ine :  
En treo ker ha gwirion e spered 'zo berrik ;  
Mez en holl fineseo ec'h e leun a itrik.

Goud a ra eo brudet fall skritur an dud disket ;  
« Me 'zo ive, 'me 'r pôtr fin, da skrivan fall-kollet. »  
Euz e holl skiencho ze eo an desteni :  
N'en euz ket e bar da c'houde ar stum d'en em veuli.

Evid foura en ho penn eo e spered digor,  
E laro n'en euz biskoaz bed ar priz a vemor :  
Kredet ive, m'ho ped, e oar mad ar gallek,  
War digare nan eo ket kreer war ar brezonek.

War an ton braz en e di c'houi 'vo digemeret ;  
Rak ma ve gwin war e dol, dirak-oc'h 'vo chanchet :  
Chanch bugel er c'havel 'zo eun tol a ijin ;  
War-n-ean e c'hout an holl nemed ar botred fin.

Ar pôtr fin evid bean parfed en e vicher  
Oar bean flour ha garo diouz ma ve an amzer :  
D'e gomzio ampezet ma ret skouarn vouar,  
Ho kourdrouzo, a dra-zur, ken a greno 'n douar.

'Vid ober d'ec'h bale eon kraz d'ec'h e lavaro :  
« Sented ouz-in, penn kalet, pe me ho luduo. »  
Neuze c'houi 'vo nec'het, en ho penn ho po droug,  
Ma kredet re varc'had mad, 'man e droad war ho koug.

« Me 'zo, eme ar potr fin, deud mad d'ar penno braz ;  
« Dre-ze, ma na ziwalled, me rai gan-ec'h eur goaz. »  
D'ho chefo, m'hen kredet, eo ive kolladen :  
Renk 'vid ober ho parv d'ec'h nemed eur c'hoezaden.

Pa vo an avel a du e roi d'ec'h alio  
Gand seblant a interest evid hoc'h aferio  
Heuliet gand holl fiars eun ali 'vo roet,  
Hak ho troad 'vo, heb-dale, e-barz'en pech stignet.

Chetu aze eun nebeud euz troio ar pôtr fin.  
E galon, eme ar vrud, 'zo ed holl da ijin ;  
Pa ne oar karet den, gand den nan eo karet :  
Gallout 'ra heb ar bluen konta e vignoned.